

ISAKA



The history of Isaac and Jacob in Kyanga as recorded in the Ataura, the first book of Moses, Genesis 24-27.

Farashinaa

Musa takada farashinaa

Netõna Isakani

Ibrahĩ jidakè ì yà sàa, mɔɔɔ Zɔnadi albalikakà'ini yãpailu. Ye ì zɔkedana guce ashi ka bii ì fɔpai mɔɔkeda, ì kè'ini: Ɔsɔɔ ma gbɛda'u buden, má tua ñ lada Zɔnadi musu kũni cerezɔ Ladu tɔzɔ, ka Kanaa cere ka má bii negũ m̀ba shi ma niniba. Yaa ma wei cereɓu ma idibina gu, ñ nee shi ma nini gube. Ye ì zɔkeda ginaa ì ì làlu ì kè: Nifi ginaa naaci wi a dɔmama a cimazɔ cere lɛɓu kimbaa? Má yaa kũni n nizo cereɓu ka n bòɔ? Ibrahĩ kè'ini: Laakalika! M̀ba yaa ma nizo gubeba. Zɔnadi Ladu Musunadi ì ma bò ma djii wei ma idibina cereɓu, ye ì yãfimani, ì alkawalikè ì kè a cere lɛɛ kpaa ma benani. Ini ye ì ì Mala'ika dɛa inagũ bii'nni watalu. Gube ye ñ nee shia ma nini. Nifi ginaa naaci wi a dɔ'mmaba, ñ bɔa yãlu ka ma tù n ladà. M̀ba yaa gube kũni ma nizɔba fa! Ye ì zɔkeda ginaa ì ɔɔ sòɔ ì zɔnadi gbɛda'u buden, ì ladà yã ginaa musu.

Zɔkeda ginaa ì zɔnadi sɔsaana shìte guda koori kũni ì zɔnadi fɔ nɔɔ bè paizɔ, ye ì kpète ì yà Nahɔɔ wei faralu Suria Mesopotamia cereɓu. Ka ì bùru gube, ì tù sɔsaana ùsã izɔ kutu

fara baa. Ka itoòkèe kè, lootoo ka negũna tà bɔ i tooji, ye ì wotukè Laduma ì kè: Zɔnadi, ma zɔnadi Ibrahĩ Ladu, ò fɔnɔkè ma zɔnadini. Tu ma tanaa nà kɛ nda itoòkè lè. Wa, má bii ducea izo kutu gule. Fara nifina nà bò i tooji, nifii ka má kea'ini ina ì bella ice ina i kishimani mà mì, ina fimani mà mi, ina kpa ma sɔsaanani mɔnɔ, má dɔa n fɔnɔkè ma zɔnadini, nifii ka n dì n zókeda Isaka mun be.

Ici yã ginaa fi ì ìnceba, ye Betueli ni Lifika bò bellazo dina ishẽma. Betuelimi Ibrahĩ bakere Nahɔɔ ni ka ì ì kũni ì ne Milikazo. Nifi nɔɔmi, ì kuguru, gũkan ci wuce'izo yãaba. Ì nù izo gu, ì i tò bella fà, ye ì cèe ibi yaa. Ye zókeda ginaa bashì ì yà ì guu lè'ini ì kè: Ma gba i mà mì, baa jĩn. Nifi ginaa kè: Mi Baaba! Ye ì ì bella ice kyãakyãa, ì i kpà'ini, ì mì. Ka ì i kpà'ini ì mì ì ìnce, ì kè: Má tɔa n sɔsaanani mɔnɔ, àna mi hari àna kã. Ye ì ì bella i kà fɔna imibɔɔlu kyãakyãa, ì cèe ì bashì ì yà i tooji izo gu, ye ì i tò sɔsaanani pai. Ye nigõni ginaa dùce, ibi waadɔa'iji shiu, dun ina dɔ Zɔnadi nà tu a tanaa kɛ nda, koo ici kɛ ndaba. Ka sɔsaana imì à ìnce, ye nigõni ginaa wula ãnzã nɔɔ kà nifi ginaani, ì wula ɔzãa kà'ini guda fia. Ìnzã ginaa gbĩtã bùru garam sɔɔru, ɔzãnanɔ kĩn garam keesɔrusɔru. Ye ì ì lálu ì kè: Fimani, dí nimi nni? Wó igu lia n djii weia? Ye ì wì'ini ì kè: Betueli nimi mani, Milika kũni Nahɔɔzo toi. Shẽe kũni tatakazo gbãa wo wei, igu bii mɔnɔ. Ye nigõni ginaa miizè cere ì kùce Zɔnadini ì kè: Wò Zɔnadi ma zɔnadi Ibrahĩ Ladu saabukpa, ici je nɔkèe kũni yãdaazo yã keeji'iniba. Mani kĩn, Zɔnadi kèmani watalu ma zɔnadi idibina wei.

Ye nifi ginaa bashì ì yà ì yā ginaa deedeekè ì weigūnani. Lifika bakere zɔ, wòta fi'ini Labā. Ì bò fara baa baazɔ, ì yà ì nigōni ginaa lì izɔ gu, zaaka ì wà a daku ìnzāa kūni ɔzāazɔ kàka, mɔnɔ yā ka nigōni ginaa kè'ini ì mà. Ka ì yà ì ì lì kūni sōsaanazɔ izɔ gu, ì kè: Nu, nni ka Zɔnadi albalikakà'nni! Bɔyāaji mbi ducea fara baa? Ma kpe mɔɔkè'nni kūni sōsaana iguzɔ. Nigōni ginaa gè kwaacelu, ye Labā sōsaana asu fùru ì shēlala butu kūni tatakazɔ kpà'àni, ì i kpà nigōni ginaani, ye ì gbe firizɔ kūni ì gūnazɔ pai.

Wò fɔbinaa dī'ini, ye ì kè: Mába fɔbia gīnaba hari mana yāfi ka ma nùzɔ. Ye Labā kè: Fi. Ye ì kè: Ibrahī zɔkedami mani. Zɔnadi albalikakà ma zɔnadini nɔɔnɔ, ye ì kè kawerɛnadi. Ì ì gbà tambuna kūni dinazɔ kūni anzarafuzɔ kūni wulaazɔ kūni zɔgōnazɔ kūni zɔnifinazɔ kūni sōsaanazɔ kūni fariganazɔ. Ma zɔnadi ginaa nɛ Sahara ni'ì nigōni ì jidakeɛlu, ye fɔ ka ma zɔnadi zɔ ì kpà ni ginaani pai. Ma zɔnadi tù ma ladà, ì kè Kanaa cere ka a bii, màba ì nifii shi a niniba. Ì kè mà yaa a djii wei a benalu, mà nɛɛ shi a nini gube. Ye ma ma zɔnadi làlu ma kè, nɛgū ginaa naaci wi a dɔmamaba kīn dee? Ì wìmani ì kè, Zɔnadi ka a dɔ'ima, ini ye ì Mala'ika dēa ina yaa duceɛjimini, dun ma tanaa nà ke nda, mà nɛɛ shi a nini a djii wei idibinalu. Ì kè mana yaa a bena gu, wònaaci wijiba, má bɔa yālu ka ma ladà'ani.

Ka ma bùru izɔ gu cèce ma kè: Zɔnadi, ma zɔnadi Ibrahī Ladu, nna wiji, tu ma tanaa nà ke nda. Má bii izɔ gu. Nifii ka nù itɔɔji, mɔnɔ ma ke'ini ina ma gba i jīn mà mi, ina kè mà mi,

a tɔa ma s̄saanani mɔɔɔ, m̄a d̄sa nifii ka n d̄i ina ke ma zɔnadi ni mun be. Hari ma ȳa ginaa fi ma gbereelu ma ìnce, ye Lifika b̄ò bellazɔ dina ishēma, ì nù izɔ gu ì i t̄ò. Ye ma ke'ini ina ma gba i mà mì. Ì a bella ìce kyāakyāa, ì ke mà mi, a kpaa ma s̄saanani mɔɔɔ. Ma mì ye ì kpà ma s̄saanani. Ye ma ì làlu, dí nimi ini? Ì ke Betueli nimi ani, Milika k̄uni Nahɔɔɔɔ toi. Ye ma ìnzāa kà'ini ì ìnlu, ma ɔzāa kà'ini ì ɔnama. Ye ma miiz̄ò cere ma kùce Zɔnadi ma zɔnadi Ibrahī Laduni, ma ì saabukpà, zaaka ì kèmani watalu jere suusuma, dun mà a zɔnadi bakere toi shite ì nini. Becere ana wi à fɔnɔɔkɛ k̄uni yādaazo yāke ma zɔnadini, à fimani. Anaaci wiji kimba, à fimani, m̄a yaa kpata kee. Labā k̄uni Betuelizɔ wì'ini à kè: Yā ginaa b̄ò Zɔnadi gu, wóba fɔkan finaa zɔba, ì nɔɔ koo ì v̄āni. Lifika lè, ì shite ì yaa'izɔ, ì gbɛɛgūa n zɔnadi ni n̄e laaka Zɔnadi fi. Ka Ibrahī zɔkɛda ginaa à yā mà, ì wùce cere Zɔnadini. Ye zāna ka wò kè k̄uni anzarafuzɔ k̄uni wulaazo k̄uni asunazo ì b̄ò ì kpà Lifikani. Ì ì bakere k̄uni ì d̄ɔɔɔ gbà fɔ kawerenadina mɔɔɔ. Ye ini k̄uni gūna ka bii'izɔ fɔb̄i à imì, ye à ì gube.

Ni, n kea gũ gbãana dee,
n bena gũa kirikea à jedinama.

Ye Lifika kpète kũni ì zɔnifinazɔ, à shià sɔsaanama, à dò
nigõni ginaama, ye ì yà'azɔ.

Ì nù ì lì Isaka cì izɔ guuzɔ ka wòta ke Ladu bite ka tà ma
wa, ì àɛ Negeve cerelu. Ì bò ì yà laasaabukɛɛji lahoolu itɔɔke,
ye ka ì werɛkpète, ì wà sɔsaana bi nua. Lifika werɛkpète ì Isaka
wà kɪn, ye ì ìɛ ì sɔsaama kyãakyãa, ì zɔkɛda ginaa làlu ì kè:
Din nigõni ka bi likaa lahoolu ibi nua daajiwole gulele? Ye
zɔkɛda ginaa wì'ini ì kè: Ma zɔnadimi. Ye Lifika ì lullubi shìte ì
tà ì werema. Ka à bùru Isaka gu, yã ka zɔkɛda ginaa kè ì
deedeekè'ini pai. Isaka gè Lifikazɔ ì dɔɔ Sahara bishekpele, ye ì
ì shì, ì kè ì nɛɛ. Ì waa'iji, ye ì zũn è ì dɔɔ ganaa gbɛji.

Ibrahĩ ni kena

Ibrahĩ negũ kɛɛ shì mɔnɔ, ì tɔmi Ketura. Ni ka ì ì'izɔ tɔn
lè: Jimarana, Yokosã, Mɛdã, Madaya, Ishibaki kũni Suazɔ.
Yokosã ye Sheba ì kũni Dedãzɔ. Dedã benan Asulina kũni
Lɛtushinazɔ kũni Lɛuminazɔ. Madaya nigõnina tɔn lè: Efa,
Efɛɛ, Hanɔki, Abida kũni Elɛdayazɔ. À pai Ketura benami.

Ibrahĩ ì fɔna kpà Isakani pai, ye ì gbadà ì wahaina
ninani, ì à dè guciyĩmma hari ì gaa, dun ànabagũ bii kũni
Isakazɔba.

Ibrahĩ ganaa

Ibrahĩ kè wě keesoowawokoori aweresɔɔruzo, ye ì gà. Ì jidakè kɔɔkɔɔ, ye ì gĩnaa gè ì dijina gu. Ì nina Isaka kũni Sama'ilazo à ì vɪri Makpela gbere'ereelu, Mamare guciĩmma, jefuu ka Hiti bè Zohaa ni Ɛfɔno mu yāa, ye Ibrahĩ lù Hitinama. Gube ye wò ì vɪrilu kũni ì ne Saharazo. Ibrahĩ gaa gběji Ladu albalikakà ì ni Isakani. Ibi acea Ladu bite ka tà ma wa izo kutu.

Sama'ila bena

Ibrahĩ ni Sama'ila bena baalun lè: Sahara zɔnegũ Hazara, Masar negũ ye ì ni ginaa ì'izo. Ì ni nigɔ̃nina tɔn lè à inaama. Ì ni nigɔ̃ni farashina tɔmi Nebayo. Ì dakuna tɔn lè: Keda, Adibeli, Mibisā, Mishima, Duma, Masa, Hadada, Tema, Yeturu, Nafishi kũni Kedemazo. Sama'ila ni nigɔ̃nina tɔn be. À gũkĩn ì tɔkà ì farani koo ì gaa. Àninɔmi bè koori awerefiazo diji farashinana.

Sama'ila kè wě keesɔɔdu awokoori aweresɔɔfiazɔ, ye ì gà ì gè ì dijina gu. Ì bena ace za Havila hari ì nà Suruma Masar cere lema yana Asuria cere oji. Àbata kũ ce shi kũni Ibrahĩ bè kenazɔba.

Isau kũni Yakubuzɔ ina

Ibrahĩ ni Isaka bena baalun lè: Ibrahĩ Isaka ì. Ka Isaka bùru wě keefia ye ì Labā daku Lifika shì. Inimi Suria cere gũ

Betueli ni ka b̀ Məsəpətamia cerelu. Isaka wotukè Zənadima a nɛɛni, zaaka nɛdaami, ye Zənadi shì'ini, ì nɛ ginaa gbishekè. Finana bi dēnɛbua ì gberɛɛlu, ye ì kè: Bəyāaji fɔ lɛ taka ma lì? Ye ì yà Zənadi laluuji. Zənadi kè'ini:

Bè guda fiaa bii n sɔ̃nɔ̃lu,
gũ fiaanano ka bii n gberɛɛlu kataa kūma.
Bè du gbādaa kpaa duula,
ni ka bɔa farashinaa erekucea gũ gbējini.

Ka ì ni'idi bùru, ì finana ì nigɔ̃nina. Ka gũ farashinaa bi bɔa, ì b̀ tɛɛ. Ì duwere kākā bùru tɔgɔɔ, ye wò tɔkà'ini Isau. Bɛɛ gbēji ka ni fiadibi bi bɔa, ì d̀ Isau gbetunema, ye wò tɔkà'ini Yakubu. Isaka wè kee'adibi ye ì ninano ì.

Ninano ashikè. Isau kè tubi ashi ka bata kata lahoomaba. Yakubu kīn gindakūda kwaace'acɛda. Isaka waa Isauji, lahoolusɔ sunaa yāaji. Lifika kīn ì waa Yakubuji.

Dikɛɛdi Yakubu bi duu kua, ye Isau c̀ lahooluzɔ, ibi nɔɔmaa. Ye ì kè Yakubuni: N yā nda! Tu mà fɔbina tɛɛ bɛɛ bi, zaaka mabi nɔɔmaa. Ì yā ye t̀ wò tɔkà Isauni ɛdɔmu. Yakubu kè: Ì n nisarakejere kpamani gīna. Ye Isau kè: Ma bùru gana, bó ma nisarakejere keamani? Ye Yakubu kè'ini: Fi n shìte Laduzɔ gīna. Ye ì kè a shìte Laduzɔ, ì a nisarakejere kpà'ini. Ye Yakubu burodi kūni bɔa du ginaazɔ kpà'ini. Ì bì ì imì, ye ì kpète ì b̀. Laale Isau ì ì nisarakejere kè kakaji.

Isaka kũni Abimelekizɔ

Nɔɔ gɛ̃ cɛrɛ ginaalu, farashinaa ka kɛ̃ Ibrahĩ looto baashi,
ye Isaka kpɛ̃tɛ̃ ì yà Filishitinina kiri Abimeleki gu Geraa. Ye
Zɔnadi bɔ̃ ì nù ì gu ì kɛ̃:

Mba yaa Masarba.
Ace guu ka má fia'nni.
Ngũ bii cɛrɛ leelu gĩna.
Magũa bii'nzɔ, má albalikakaa'nni.
Má cɛrɛ lee kpaa'nni pai kũni n benazɔ,
alkawali ka ma kɛ̃ n djiini, má kea'nni.
Má n bee lafaa du sɔrɔnazɔ,
má cɛrɛ lee kpaa'àni pai.
Bena ka bii dunialu pai
à albalika lia n bee sabu,
ka Ibrahĩ ma yā mà yāaji.
Ì ma ɔnidɔgu wà,
yāna ka ma fī ì kũ
kũni ma yāgifananazɔ kũni ma dɔɔkanazɔ.

Ye Isaka gbɛ̃ɛgũ Geraa. Ka fara gũna bi ì lalua ì nɛ yāji, ì
kɛ̃ a dakumi. Zaaka ibi wohumaa, ibi waa ana kɛ̃ a nɛemi, wò
a dɛa a nɛɛ yāaji, zaaka nɛgũ ginaa nɔɔ. Ka ibi difiaakea gubɛ,
Filishitinina kiri Abimeleki bi waadɔa cɛrɛ kpɛ forolu, ye ì wà
Isaka bi ì nɛɛ kukũa winaazɔ. Ye ì Isaka shishi ì kɛ̃: Ashe n
nɛemi fa! Bɔyāaji ye n kɛ̃ n dakumi? Ì wì'ini ì kɛ̃: Mabi waa wò
ma dɛa ì yāaji. Abimeleki kɛ̃: Bó ye n kèwoni laale? Jĩn ye
gbɛ̃ɛgũ ka wo gũkɛɛ nà wuce kũni n nɛ ginaazɔ, dà yāa n wo

kà taalilu. Ye Abimeleki yāfi gūpaini ì kè: Gū ka ɔkè nigōni ginaama kūni ì nēezɔ, wò ì dea.

Isaka fɔ t̃ɔ cere ginaalu, ye ì fɔ lì w̃e beɛ tara keesɔru, ka Zɔnadi albalikakà'ini yāaji. Ì ashikè, mɔnɔ ì fɔna tagū lafaa hari ì kè kawerenadi gbāa bakara. Ì tambuna kūni dinazɔ zɔ gbāa kūni zɔnazɔ, ye Filishitinina gōnɔkè'izɔ. Ye izɔna ka ì djii Ibrahī zɔkedana ỹè ì looto à tàta āatēzɔ pai. Ye Abimeleki kè Isakani: Guwoma, zaaka n gbādaa kpàwola nɔɔnɔ.

Ye Isaka b̃ò gube, ì gaa gifa Geraa guwucenaalu, ye ì difiaakè gube. Izɔna ka wò ỹè ì djii Ibrahī lootoo ye Filishitinina tàta ì gaa gbēji ye ì c̃èè ì b̃òbɔ, tɔka ì djii kà'àni yāa, ì kà'àni mɔnɔ. Isaka zɔkedana izɔ keɛ ỹè guwucena ginaalu, ye à b̃ò ì nɔɔma. Ye Geraa fɔkurukedana kakaukè kūni Isaka fɔkurukedanazɔ à kè: Wo imi. Ye ì tɔkà izɔ ginaani Kakau, ka à kakaukè'izɔ yāaji. À izɔ keɛ ỹè, ye wò kakaukè izɔ ginaa yā musu mɔnɔ, ye ì tɔkà'ini Jedikeɛ. Ì gù gube, ye ì izɔ keɛ ỹè mɔnɔ, àci kakaukè ì yā musu mɔnɔba. Ye ì tɔkà'ini Shīmfurugu, zaaka ì kè: Zɔnadi wo gbà shīmfurugu, wó ɔdaa beɛɛ.

Beɛ gbēji ì yà Beesheba. Zɔnadi b̃ò ì nù ì gu gāɔni beɛ ì kè:

Manimi n djii Ibrahī Ladu,
m̃ba wohumaba, zaaka má bii'nzɔ.
Má albalikakaa'ñni, má n bee lafaa
ma zɔkeda Ibrahī yāaji.

Gube ì sāmakegu bù ì Zɔnadi shìshi. Ye ì gaa gìfa gube, ì zɔkedana bi izo yēa. Ye Abimēleki bò Geraa ì nù Isaka gu kūni ì yākpada Ahuzazo kūni ì dēbukedana guce ashi Fikɔlizo. Isaka ì à làlu ì kè: Laaka a zāmalu a ma kēke a wei, ì kè laala a nù ma gu? À wì'ini à kè: Wo wà Zɔnadi bii'nzo, ye wo kè ì nzo wò lekeduke, wò lada kūni ì yā musu, dun mba fɔ vāni kan kewoniba, zaaka woci fɔkan kē'nniba. Fɔ nzo ye wo kè'nni, wo n tū baani, ye Zɔnadi albalikakà'nni. Ye Isaka ì à yēkè, à fɔbì à imì. Ka à kpète saraazo, à ladà kūni, ye Isaka dùce'ani, à bò ì gu baani. Dibēedi Isaka zɔkedana nù izo ka à yē à ì yā fì'ini à kè: Wo i lì. Ye ì tɔkàni Shēba. Ì yāaji ye tū wòta fì fara ginaani Bēeshēba hari cece.

Ka Isau bùru wē keefia, ì Hiti nifii shì fia, Beerì ni Yudi kūni Eloni ni Bashemazo. Isaka kūni Lifikazo zūn tagū wurina à yāaji.

Isaka gara nzo fina Yakubuni

Isaka jidakè, ì were ba gbāda mɔnɔba, ibai guuwaa nɔɔba. Ye ì ì ni saraa shìshi ì kè: Ni! Ye ì wì'ini ì kè: Maa le. Isaka kè: Ma jidakè, maci ma gaa di dōba. N sáa shite kūni n kɔkɔtɔzo, yaa ñ lahoolu sɔɔ tōmani. Duu ka má waaji ñ ku ñ nuzɔmani mà bì, mà garaake'nni hari ma gaa.

Yā ginaa ka Isaka bi fia Isauni Lifika mà. Ka Isau kpète ì yà tubikegu, ye ì yà ì fì Yakubuni ì kè: Ma mà n djii bi yāfia n bakereni ì kè, ina yaa ina sɔɔ de'ani, ina duu ka a waaji kuzo'ani à bì, á garaakea'ini kūni Zɔnadi tɔzo hari a gaa. Ye

Lifika cɛɛ ɪ kɛ'ini: Ma yā ma, yā ka má kakaa'nni n̄ kɛ. Yaa buinalu, buini nɔɔ kũ guda fia n̄ de, n̄ mɔɔkɛ n̄ nuzɔ, má n djii duu kua'ini ka ɪ waaji, ń yaazɔ'ini ina b̄i, ina garaake'nni hari ɪ gaa. Ye Yakubu kɛ ɪ d̄ɔni: Ma bakere kākā zɔ, mani k̄n má mɔɔmɔɔ. Ma djii nà ɔkɛmama mɔnɔ ina ma d̄ɔ, ɪ ma dia bishenadi, ɪ lekeamani garakenaa gurubi. Ye ɪ d̄ɔ kɛ'ini: Ladu nà tu lɛ ka ina kɛ'nni lɛɛ nà gbɛɛgũmama. Ma yā ma dee! Yaa n̄ de n̄ nuzɔmani.

Ye Yakubu yà ɪ buinanɔ dɛ ɪ n̄uzɔ ɪ d̄ɔni, ye duu ka ɪ djii waaji ɪ k̄uzɔ'ini. Ye ɪ ni sara asu nɔɔ ka bii ɪ koru ɪ sh̄ite ɪ kà ɪ ni fiadibini. ɪ buini shɛɛ f̄ɛf̄ɛ ɪ ɔnama k̄ni ɪ lɔkɔzɔ ka ba kākā zɔba. Ye duu k̄ni burodizɔ ka ɪ kɛ ɪ kpà'ini.

Yakubu yà ɪ djii gu ɪ kɛ: Baaba! ɪ kɛ: Maa le! Ma ni kpacimi? Yakubu w̄'ini ɪ kɛ: Manimi Isau n ni saraa. Laaka n fimani, ma kɛ. Kpetɛ n̄ ace n̄ ma ɔ'ɪ bi, n̄ garaakɛmani. Ye Isaka kɛ ɪ nini: O'o! N l̄i kɔa? ɪ w̄'ini ɪ kɛ: Zɔnadi n Ladu ye sa'aa kpàmani. Ye Isaka kɛ'ini: Nu ma gu mà ɔkɛ'mma, dun mà d̄ɔ koo ma ni Isaumi yāda. Yakubu n̄ ɪ djii gu, ye ɪ ɔkɛ'ima ɪ kɛ: Lɔkɔlu lɛɛ Yakubu lɔkɔluumi, amaa ɔ lɛɛ Isau ɔmi. Ye ici ɪ d̄ɔba, ka ɪ ɔna kākā zɔ du Isau ɔɔzɔ yāaji. ɪ waaji a garaake'ini, ye ɪ ɪ l̄alu ḡina: Ma ni Isau nnimi yādaa? ɪ kɛ: Ee, manimi! Ye ɪ kɛ: Fɔ kpamani mà n ɔ'ɪ bi, má garaakea'nni. Ka ɪ d̄i'ini, ye ɪ b̄i. ɪ n̄'ini inabi'izɔ, ɪ m̄i mɔnɔ. Ye ɪ djii kɛ'ini: Nu ma gu, n̄ lekamama. Ye ɪ n̄ ɪ gu ɪ lɛkà'ima. Ka Isaka ɪ asuna gb̄n mà, ye ɪ garaakɛ'ini ɪ kɛ:

Ma ni gbīn bii du jefuuzo ka Zonadi albalikakàni.
Ladu nà n gba butu ka b̀ zaa musu,
ina n gba cere taakinadi,
fowerere kũni inabi'izo nagũ bii gbāa'nni.
Gũna nà zoke'nni,
bena nà kuce'nni,
nnimi n gũna zonadi,
n ḍo nina nà kuce'nni.
Ladu nà leke gũnani ka lekè'nni,
ina albalikaka gũnani ka gara n̄o fi'nni.

Ka Isaka garaakè Yakubuni ì ìnce, ye Yakubu b̀ ì gu. Ka ì bakere cì tubikeguzo kyāakyāa, ye ì fobinaa kè ì djiini kīn, ì yàzo'ini, ye ì kè'ini: Baaba! Kpete ò ma ɔ'i bi, ò garaakemani. Ye ì djii ì làlu ì kè: Nnimi dí? Ì wì'ini ì kè: Manimi n ni sara Isau. Yā ginaa Isaka kũ, ibi lukpakpaa gbāda ì kè: Dí ye s̄o dè ì nùzomanì yāa hari í nua, ye ma sù? Ma garaakè'ini kɔ, m̄o ì albalika ginaa lia. Ka Isau ì djii yā ginaa mà, ì kuaadà ì ù ì kè indawere, ye ì kè: Baaba! Garaakemani kīn. Ye ì kè: N daku nù kũni azancizo ì n garakenaa shìte kɔ. Ye Isau kè: Ba ì t̄mì Yakububaa Ì azancikèmani ì kè tara fia gube bece. Ì ma nisarakejere shìmama yāa, ye ì ma garakenaa shìmama bece m̄o. Mába garakenaa lia kimba dee? Isaka wì'ini ì kè: Ma ì d̄i n zonadi, ma ì idibina kè ì zokedana, ma fowerere kũni inabi'izo kpà'ini. Bó ye má f̄a mà ke'nni m̄o? Isau kè ì djiini: Baaba, garakena be d̄in ye n z̄o? Gara kee kemani kīn Baaba. Ye Isau ɔkà uuji. Ye ì djii wì'ini ì kè:

Cere ka ngũa bii bagũa taaki zɔba,
butu ba bɔa'nni zaa musuba.
Ngũa takuba kũa dipai,
ń zɔkea n dakuni.
Laaka n zũn ba wuceaba,
ń ì zunku bɔa'mma.

Isau Yakubu yã kũ ì zũnlu garakenaa ka ì djii kè'ini yãaji,
ye ì kè ì zũnlu: Ma djii gaa ba sàaba, má gĩnaa mà ma daku
de. Yã ka Isau fi ì gẽ Lifika tɔnɔlu, ye ì Yakubu shishi ì kè: Isau
waaji ina findebu'mma ina n de. Ma yã ma bece. Kpete ñ bashi
ñ yaa ma bakere Labã wei Harana, ñgũ bii'izɔ gube gĩna hari n
bakere zũmfanaa nà ẽ. Ì zũn nà ẽ, ina sãsã yãma ka n kè'ini,
má gũ dẽa ina ci'nzɔ. Mába waaji mà kara ma ni fiaaji pai di
duba.

Ye Lifika kè Isakani: Hiti negũna yã bɔ ma zũnlu.
Yakubu nà Hiti nifii shi cerelu gule du Isau negũ benazɔ, ma
zũn bagũa bii nda mɔnɔba.